

15 JAN 1998

Anwar-Seni

PELUKIS BOLEH MENDEFINISIKAN SEMANGAT DAN IDENTITI ASEAN, KATA ANWAR

KUALA LUMPUR, 15 Jan (Bernama) -- Timbalan Perdana Menteri Datuk Seri Anwar Ibrahim berkata para pelukis dari negara-negara Asean boleh membantu mendefinisikan semangat dan entiti serantau pertubuhan serantau itu.

Beliau berkata negara-negara Asean sedang bergerak ke hadapan ke arah integrasi menjadi sebuah entiti serantau dan ketika proses ini dipercepatkan, pendefinisian entiti Asean itu perlu dipertajamkan.

"Kita harus nyata dan menjelaskan blok-blok entiti kita, Kepentingan bersama dan usaha memburu kemakmuran, walaupun terhenti buat sementara waktu, merupakan alasan yang kuat bagi kita bersatu," katanya ketika merasmikan pameran "Asean Masterworks" di Balai Seni Lukis Negara di sini.

Pameran itu, yang memaparkan 60 hasil seni oleh 60 pelukis dari negara-negara anggota Asean, akan diadakan sehingga 7 Feb dan dibuka kepada orang ramai.

Ia sepatutnya dirasmikan oleh Perdana Menteri Datuk Seri Dr Mahathir Mohamad pada 15 Dis lalu di Palace of the Golden Horses bersempena Sidang Kemuncak Asean tetapi ia kemudian dihadkan kepada anggota delegasi yang menghadiri sidang kemuncak itu dan tetamu khas.

Anwar berkata pemupukan daripada segi perasaan kemasyarakatan memerlukan ikatan ramuan idealistik dan usaha mencari ramuan itu merupakan tugas "para pelukis kita".

Beliau berkata hasil seni para pelukis melambangkan jiwa masyarakat dan menunjukkan dengan jelas pertumbuhan dalaman masyarakat itu sendiri.

"Walaupun pelukis itu sendiri mungkin lebih berminat kepada pernyataan diri, pernyataan itu membantu masyarakatnya untuk memahami identiti mereka sendiri," katanya.

Yang turut hadir ialah Menteri Kebudayaan, Kesenian dan Pelancongan Datuk Sabbaruddin Chik.

Pameran itu merupakan idea Tan Sri Ahmad Kamil Jaafar, Wakil Khas kepada Perdana Menteri. -- BERNAMA

AFY AKD